

## ԿԱՐԳ

ԱՐՏԱԿԱՐԳ ՊԱՏԱՀԱՐՆԵՐԻ ԱՐԱԳ ԱՐՁԱԳԱՆՔՄԱՆ (ՓՐԿԱՐԱՐ) ԾԱՌԱՅՈՒԹՅԱՆ, ՈՍՏԻԿԱՆՈՒԹՅԱՆ ԵՎ ՇՏԱՊ ԲԺՇԿԱԿԱՆ ՕԳՆՈՒԹՅԱՆ ԾԱՌԱՅՈՒԹՅԱՆ ՀԱՄԱՐՆԵՐԻՆ ԿԱՏԱՐՎՈՂ ԿԱՆՉԵՐԻ (ՀԱՂՈՐԴՈՒՄՆԵՐԻ) ԴԵՊՔՈՒՄ ՀԱՃԱԽՈՐԴԻ ԿՈՂՄԻՑ ՕԳՏԱԳՈՐԾՎՈՂ ԾԱՌԱՅՈՒԹՅԱՆ ՎԱՅՐԻ ՎԵՐԱԲԵՐՅԱԼ ՏԵՂԵԿՈՒԹՅՈՒՆՆԵՐԸ (ՀԱՃԱԽՈՐԴԻ ՏԵՂՈՐՈՇՈՒՄ) ԵՎ ՀԱՃԱԽՈՐԴԻ ԱՆՁՆԱԿԱՆ ՏՎՅԱԼՆԵՐԸ ՀԱՆՐԱՅԻՆ ԷԼԵԿՏՐՈՆԱՅԻՆ ՀԱՂՈՐԴԱԿՑՈՒԹՅԱՆ ՑԱՆՑԻ ՕՊԵՐԱՏՈՐԻ ԿՈՂՄԻՑ ԲԱՑԱՀԱՅՏԵԼՈՒ

1. Սույն կարգը սահմանում է արտակարգ պատահարների արագ արձագանքման (փրկարար) ծառայության, ոստիկանության և շտապ բժշկական օգնության ծառայության համարներին կատարվող կանչերի (հաղորդումների) դեպքում հաճախորդի կողմից օգտագործվող ծառայության վայրի վերաբերյալ տեղեկությունները (հաճախորդի տեղորոշում) և հաճախորդի անձնական տվյալները համարի կամ կողի զբաղեցման թույլտվություն ունեցող հանրային էլեկտրոնային հաղորդակցության ցանցի օպերատորի կողմից բացահայտելու կարգը, այդ թվում՝ տեղորոշման համակարգի գործարկման պայմանները, տեղորոշման բացահայտման ժամկետները:

2. Սույն կարգում օգտագործված հիմնական հասկացություններն են՝

1) Արագ արձագանքման ծառայությունների համարներ՝ արտակարգ պատահարների արագ արձագանքման (փրկարար) ծառայության՝ 112, 911, 101, ոստիկանության՝ 102 և շտապ բժշկական օգնության ծառայության՝ 103 համարներ.

2) Կանչ (հաղորդում)՝ դեպի Արագ արձագանքման համարներ կատարված զանգ կամ ուղարկված կարճ հաղորդագրություն (SMS).

3) Օպերատոր՝ համարի կամ կողի զբաղեցման թույլտվություն ունեցող հանրային էլեկտրոնային հաղորդակցության ցանցի օպերատոր.

4) Տվյալների կենտրոն՝ Կանչը սպասարկող ծառայության տվյալների կենտրոն.

5) Ցանցի վերջնավորման կետ՝ ֆիզիկական կետ, որտեղ հաճախորդին տրամադրվում է հասանելիություն հանրային ամրակցված հեռախոսակապի ցանցին, և որը նույնականացվում է բաժանորդի ծառայությունների մատուցման պայմանագրում ամրագրված՝ ծառայությունների մատուցման հասցեով.

6) Բազային կայանի տեղակայման դիրք՝ հանրային շարժական հեռախոսակապի ցանցին հաճախորդի հասանելիությունն ապահովող (կանչը սպասարկող)՝ հանրային շարժական կապի բազային կայանի դիրքը, որը նույնականացվում է որոշակի համարով (Cell ID) և աշխարհագրական տեղակայման կոորդինատներով.

7) Բազային կայանի սփռման շառավիղ՝ բազային կայանի կողմից սպասարկվող տարածություն, որի միջոցով կանչ իրականացնողը միանում է հանրային շարժական հեռախոսակապի ցանցին, երբ սկզբնավորվում է կանչը.

8) Հաճախորդի տեղորոշման տվյալ՝ հանրային էլեկտրոնային հաղորդակցության ցանցում մշակվող տվյալ, այդ թվում՝ Ցանցի վերջնավորման կետ կամ Բազային կայանի տեղակայման դիրք և սփռման շառավիղ, որը հնարավորություն է տալիս որոշել Կանչ իրականացնող վերջնակետային սարքավորման աշխարհագրական դիրքը:

3. Հաճախորդի տեղորոշման և անձնական տվյալների բացահայտման ժամկետն սկսվում է կատարվող Կանչերի (հաղորդումների) պահից և տևում է մինչև անհրաժեշտ օգնության ցուցաբերումը:

4. Օպերատորը, որի ցանցում սկզբնավորվել է Կանչը՝ Տվյալների կենտրոնի յուրաքանչյուր հարցման (հարցումը կատարվում է Կանչ իրականացրած հեռախոսահամարի ներկայացմամբ) դեպքում՝ փոխանցում է Հաճախորդի տեղորոշման և անձնական տվյալների վերաբերյալ հետևյալ տեղեկությունները.

1) ֆիզիկական անձ հանդիսացող հաճախորդի դեպքում՝ անունը, ազգանունը, անձը հաստատող փաստաթղթի տվյալները, իսկ իրավաբանական անձ հանդիսացող հաճախորդի դեպքում՝ անվանումը, հարկ վճարողի հաշվառման համարի տվյալները.

2) հանրային ամրակցված հեռախոսակապի ցանցում կանչի դեպքում՝ Ցանցի վերջնավորման կետը.

3) հանրային շարժական հեռախոսակապի ցանցում կանչի դեպքում՝ Բազային կայանի տեղակայման դիրքը և սփռման շառավիղը (բառացությամբ՝ ձայնային ծառայությունների VoWi-Fi/Wi-Fi calling տեխնոլոգիաներով կատարված կանչերի դեպքերի):

5. Սույն կարգի 4-րդ կետի 1-ին և 2-րդ ենթակետերում նշված տվյալները՝ Օպերատորի կողմից Տվյալների կենտրոնին փոխանցվում են անմիջապես (իրական ժամանակում), իսկ 4-րդ կետի 3-րդ ենթակետում նշված տվյալները՝ Տվյալների կենտրոնի հարցումից հետո ոչ ավելի, քան 20 րոպեի ընթացքում:

6. Սույն կարգի 4-րդ կետով նախատեսված տվյալները Օպերատորի կողմից Տվյալների կենտրոններին փոխանցվում են բացառապես փակ պաշտպանված կապուղիներով:

7. Օպերատորը հաճախորդներին առաջարկվող հանրային էլեկտրոնային հաղորդակցության ձայնային ծառայությունների մատուցման վերաբերյալ պայմանագրերում (ծառայությունների մատուցման ընդհանուր պայմաններում) նախատեսում է դրույթ՝ Կանչի դեպքում Կանչ իրականացնողի տեղորոշման և անձնական տվյալների հասանելիության ապահովման վերաբերյալ:

Սույն կարգը չի տարածվում հեռախոսասարքի արտակարգ իրավիճակների զանգի (emergency call) ռեժիմում առանց հեռախոսաքարտի (SIM քարտի) առկայության կատարված Կանչերի դեպքերի վրա: